

16. oktober 1998

UKA 1998/21

**Inatsisartut Akileraartarnermut ataatsimiititaata Aningaasarsianit
akileraarutit pillugit Inatsisartut inatsisaata**

allanngortinneqarneranik Inatsisartut inatsisissaattut siunnersuut

pillugu

ISUMALIUTISSIISUTAA

Aappassaaneerlugu suliarineqarnissaanut tunniunneqartoq

Suliamik suliarinninnermi Inatsisartut Akileraartarnermut ataatsimiititaannit
peqataapput

inatsisartuni ilaasortaq Karl Lyberth (S), siulittaasoq
inatsisartuni ilaasortaq Laannguaq Lynge (S)
inatsisartuni ilaasortaq Siverth K. Heilmann (A)
inatsisartuni ilaasortaq Otto Storch (A) Knud Sørensenimut sinniisussatut
inatsisartuni ilaasortaq Manasse Berthelsen (IA)

Inatsisartut Akileraartarnermut ataatsimiititaat 25. september aamma 7. oktober 1998
ataatsimiimmat Aningaasarsianit akileraarutit pillugit Inatsisartut inatsisaata
allanngortinneqarneranik Inatsisartut inatsisissaattut siunnersuut suliarineqarpoq.
Suliarinninnerminut atugassamik ataatsimiititaq Aningaasaqarnermut Ineqarnermullu
Naalakkersuisumik 7. oktober 1998 isumasioqatiginnippoq, soorluttaaq
ataatsimiititaq Naalakkersuisuni ilaasortamit paasissutissanik allaganngorlugu
pissarsisoq.

Selskabip pigisaasa akiligassaasalu ilaasa tamarmiusulluunniit selskabimut allamut
tunniunneqarneranni nalinginnaasuvoq pigisat akiligassallu ataasiakkaat pillugit
maleruagassat atuuttut naapertorlugit selskabimi unittumi akileraaruserneqartarnerat.

Mannali tikillugu Skatterådip akileraarutitigut sunniuteqanngitsumik kattunnerit
nangitsinermik tunngaveqartut amerlanngitsut akuerisarsimavai.

Taamaammat siunnersuutip siunertaraa selskabit akileraarutitigut
sunniuteqanngitsumik kattussinnaanerisa inatsisiliunneqarnissaat.

Kattunnerit akileraarutitigut maleruagassartaat nangitsinermik tunngaveqarput. Tassa imaappoq selskabip unittup pigisamigut aamma akiliagassamigut, kattunnermi, pigisanik agguataarinermi nuussinermiluunniit selskabimut ingerlaqqittumut nuunneqartutigut iluanaarutai imaluunniit annaasai selskabimi unittumi akileraaruserneqarneq ajortut. Akileraarusiineq aatsaat pissaaq selskabip ingerlaqqittup pigisat akiligassallu nanginneqarsimasut tunippagit. Taavali pigisat akiligassallu nanginneqartut selskabip ingerlaqqittup aningaasarsiaasa naatsorsorneqarneranni, selskabip unittup piffissani taakkuninnga pissarsiffiini pissarsiatut isigineqassapput, aammalu selskabip unittup akiliutigisimasaatulli akilittut isigineqassallutik, soorluttaaq selskabip unittup akileraarutitigut nalikilliliissutigisimasinnaasai il.il. selskabimit ingerlaqqittumit taamatut pineqarsimasutut isigineqassasut.

Akileraarutitaqanngitsumik kattunneq siunertarineqanngitsunik iluaqutissartaqaqqunagu siunnersuutigineqarpoq akileraarutitigut sunnuteqanngitsumik kattunniarneq pillugu Skatterådimit qinnuteqartoqartarnissaa, kiisalu aamma kattunnermi akileraarutitigut iluaqutissaasinnaasut siunertarineqanngitsut sunnuteqannginnissaat pillugit Skatterådi immikkut piumasarisasunik aalajangersaasinnaassasoq. Aammattaaq siunnersuutaavoq kattunneq akileraannginnissamik siunertaqarpat imaluunniit akileraannginnissaq siunertanut pingaarnernut ilaappat Skatterådip itigartitsinissaminut periarfissaqarnissaa.

Siunnersuut imarisamigut teknikertalerujussuummat Akileraartarnermut ataatsimiititaq Aningaasaqarnermut Ineqarnermullu Naalakkersuisumik ilaatigut isumasuisimavoq, ilaatigullu Naalakkersuisumit pineqartumit allakkatigut paasissutissanik aamma pissarsisimalluni.

Akileraartarnermut ataatsimiititap siunnersuutip kingunerisinnaasai immikkut samminiarsimavai, aammattaaq Akileraartarnermut ataatsimiititap naammagisimaarlugu maluginiarpaa akileraarutitigut arlaatigulluunniit kinguneqartussaannngitsumik kattussisinnaaneq, Skatterådip akuersineratigut, ingerlanneqarsinnaasassasoq.

Akileraartarnermut ataatsimiititap isumaqatigiittup ilimagaa, Skatterådip, akileraarutitigut arlaatigulluunniit kinguneqartussaannngitsumik kattussinissaq, akuerinaviannngikkaa kattussiniarneq akileraarutitigut iluaqutissat kisiisa pillugit tamakkiisumik ilaannakortumilluunniit ingerlanniarneqarpat, aatsaalli tamanna pisassasoq aningaasaqarnikkut illersorneqarsinnaasumik pineqartoq ingerlanneqarsinnaappat, assersuutigalugu nutaamik aqqissuusseqqinnermi imaluunniit selskabini pisariillisaanerit ingerlanneqassatillugit, tamatumani selskabit pineqartut, Skatterådimit akuerineqarsinnaasumik, akileraarutitigut arlaatigulluunniit kinguneqartussaannngitsumik kattussinissamut atatillugu niueqateqarpata.

Naalakkersuisuni ilaasortaq siunnersuutip kingunerisinnaasai pillugit nassuiaateqarnermini Akileraartarnermut ataatsimiititamut assersuumminik saqqummiussaqarpoq. Assersuummi ilaatigut paasissutissiissutigineqarpoq akileraarutitigut kingunerisinnaasat siunnersuummi maleruagassat atoraanni qanoq

issanersut, aamma maleruagassat ullumikkut atuuttut atoraanni atugarisat qanoq inissisimasarnersut.

Naalackersuisuni ilaasortap nassuiaataata takutippaa siunnersuutikkut pineqartoq tassarpiaasoq akileraarutitigut iluaqutissaq selskabimi ingerlaqqittumiiginnassasoq, kattunnikkut naliliutigilikkat selskabimit tunineqarnissaasa tungaanut, taamaalillunilu selskabip ingerlaqqittup aningaasaqarnera pitsaanerulissalluni kiisalu selskabi ingerlaqqittoq, selskabip tiguneqartup akileraarutitigut inissisimaneranik tiguisussaammat, kattunnikkut eqqunngitsumik tunngavilimmik akileraarutitigut iluaqutissarsissanngitsaq.

Siunnersuummi immikkoortup aappaa tassaavoq selskabini, kinguaariinnit tulliuuttunit ingerlanneqalernissaminut piukkunnarsisuni, sulisut aningaasarsiamik akileraaruserneqarnissaraluannik kinguartitsisinnaalissasut 50.000 kr. pallillugit nalinginut, tamatumani aningaasarsiat pineqartut atorneqassappata selskabimi kinguaariinnit tulliuuttunit ingerlanneqalernissaminut piukkunnarsisumi aktianik, imaluunniit piginneqataassutinik (anpartinik) pisinermut, soorluttaaq sulisorineqartup iluanaarutaanit akileraarusiinissaq 50.000 kr. palillugit nalinganik kinguartitsisinnaaneq pisinnaassasoq sulisorineqartoq selskabimi kinguaariinnit tulliuuttunit ingerlanneqalernissaminut piukkunnarsisumi aktianik, imaluunniit piginneqataassutinik (anpartinik) nalingi naapertuun-nerakkat ataallugit pisimappat.

Akileraartarnermut ataatsimiititaq isumaqatigiittoq isumaqarpoq sulisorineqartup isertitarisaanit akileraarusiinissamut 100.000 kr. nalingat pallillugu kinguartitsisinnaanissaq periarfissaalluortoq selskabimi pineqartuni kinguaariinnut tulliuuttunut tunniussisinnaasoqartalernissaanut.

Akileraartarnermut ataatsimiititap immikkut naammagisimaarlugu maluginiarpaa selskabimi sulisorineqartoq aamma aktianik amerlanerpaanik pigisaqartoq siunnersuut naapertorlugu periarfissaqalissammata taamatut kinguaariinnut tulliuuttunut naapertuulluurtumik nuussisoqarsinnaasalernissaanut.

Akileraartarnermut ataatsimiititami amerlanerussuteqartut, Siumut Atassullu, matumuuna inassutigissavaat aningaasarsianit akileraarutit pillugit Inatsisartut inatsisaata allanngortinneqarnissaanik Inatsisartut inatsisaattut siunnersuut saqqummiunneqartoq akuereqqullugu, amerlanerussuteqartut isumaqarmata inuussutissarsiummik ingerlatsisut pitsaanerpaamik periarfissaqartinneqarlutik sulisinnaasariaqartut, taamaamallu inuussutissarsiummik ingerlatsisut selskabit kattunnerisigut eqiterinissamik pisariaqartitsinerat akileraartarnermut tunngasutigut akornuserniarneqassanngitsaq, taakkumi ilusiliinerup iluarsiivigineqarneratigut siunertamut naapertuuttutut isigineqartariaqarmata kiisalu selskabip ingerlaqqittup aningaasarissaarnerulernera kattussinerup ilumut piviusunnngortinneqarsinnaaneranut aalajangiisuulluinnassammat.

Ataatsimiititami ikinnerussuteqartut, Inuit Ataqtigiit, isumaqataannngilaq selskabit kattunnerminni akileraarutitigut sunniuteqanngitsumik pitsaanerumik periarfissinneqarnissaannut, Inuit Ataqtigiimmi isumaqarmata selskabit angisuut suli pitsaanerumik periarfissaqalissasut selskabinik mikinerusunik

tigusiortornissaminnut, tamatumalu kingunerissagaa eqiterinerit pisariillisaanerillu inuiaqatigiinni suliffissaqartitsinerup annikinnerulernissaanik.

Selskabit eqiterillutik pisariillisaaniarlutillu kattunnissartik kissaatigippassuk Inuit Ataqatigiit isumaqarput inuiaqatigiit akileraarutigut iluanaarnarnerusumik aaqqissuisariaqanngitsut, eqiterinerimmi pisariillisaanerillu imminni selskabimut ingerlaqqittumut ingerlaannarnissamik periarfissiisussaammata.

Taamaammat Inuit Ataqatigiit §§ 25 c, 25 d, 25 e, 25 f, 25 g, 25 h, 25 i, 25 j aamma 25 k-mik Inatsisartut aningaasarsianit akileraarutit pillugit inatsisaata allangortinneqarnissaanik Inatsisartut inatsisissaattut siunnersuumiittunik akuerseqataallutik taaseqataasinnaanngillat.

Karl Lyberth
ataatsimiititami
siulittaasoq

Laannguaq Lynge (S)

Sivert K. Heilmann (A)

Otto Storch (A)

Manasse Berthelsen (IA)